

佛說堅意經

後漢三藏安世高譯

聞如是一時佛在舍衛國祇樹給孤獨園佛告阿難我今禪定憐傷世人不知佛道正真弘深而以淺偽輕薄之言欲設嫉心謗毀道根妄作窮難難吾弟子汝當正心知此罪人或是邪妖惡師或是不知世俗奸人若諸菩薩比丘僧比丘尼優婆塞優婆夷明經高潔開解愚冥爲說生死罪福所鍾設其即解知服道真此爲罪滅福生之人若其指掌爲說橋梁心懷憤憤意不欲聞雖欲強聽心多睡眠或壞道法輕毀沙門及優婆塞惡口妄言當明此人爲罪所牽沙門賢者以忍爲先當如清水無所不淨死人死狗死蛇屎尿亦皆洗之然不毀水清亦當持心有如掃帚掃地

淨不淨死人死狗死蛇屎尿皆亦掃之然不毀於帚矣亦當復如風火之力光死人死狗死蛇屎尿亦吹亦燒然不毀風火之力光若人欲來殺已已亦不瞋欲來謗已已亦不瞋欲來譖已已亦不瞋欲來笑已已亦不瞋欲來壞已使不事佛法已亦不瞋但當慈心正心惡滅福生邪不入正萬惡消爛佛告阿難其有好心善意之人聞佛明法一心而聽能一日可不能一日半日可不能半日一時可不能一時半時可不能半時須臾可其福不可量不可訾也汝當廣爲諸比丘僧比丘尼優婆塞優婆夷白衣人民說之并當廣爲說布施種生死糧其有齋日施設飯食請召四輩高經賢者沙門道人施設高座論講佛經燒香然燈光明達天諸天喜笑皆下虛空則

耳來聽莫不欣然其有破慳布施爲福善神
即下營救門戶穰禍滅怪出與利會利則而
吉終無怨惡譬如種穀隨種而生種善得福
種惡獲罪殃未有不種而獲果實當正爾心
福自歸身慎無卜問爲邪所牽心懷狐疑善
神遠人動入罪地所爲不成不知毀戒反怨
佛神事之無益遂不正心男子女人其有聞
此經者及奉持讀誦者莫不得福阿難歡喜
起爲佛作禮

佛說堅意經

卷一

十六